



Cun il sustegn da la fracziun socialdemocratica dal cussegl grond s'engascha deputà Andri Perl per ina meglra integrasiun da fugitivs renconuschids e recepids transitoricamain. FOTO M. HARTMANN

«Lavor enstagl agid social per ils fugitivs»

Incumbensa da la fracziun socialdemocratica dal cussegl grond

■ (mc) **Cun ina incumbensa da fracziun pretenda la fracziun socialdemocratica dal cussegl grond che la regenza s'engaschia a moda consequenta per integrar requirents d'asil renconuschids en il process da lavor. Quai duai succeder en cooperaziun cun la confederaziun, las vischnancas e l'economia.** Sco quai che deputà *Andri Perl* (ps Cuir) constatescha sin fundament da dus artgels en il «Beobachter» ed en la «Südostschweiz» èn actualmain mo gist 28,6 pertschient dals fugitivs renconuschids e 40 pertschient dals fugitivs recepids transitoricamain en il Grischun integrads en la lavor professunala. Era sch'il Grischun è en quest regard in bun exempel en cumparegliaziun cun ils ulteriurs chantuns sajan las perspectivas tuttina inquietantas. Tenor indicaziuns en il palpìri da discussiun «lavor stagl agid social» da la Conferenza svizra da l'agid social èn 55 pertschient dals requirents d'asil da l'onn 2014 pli giuven che 25 onns. La conferenza quinta plinavant ch'ils custs socials da vischnancas e chantuns vegnian a crescer per quatter pertschient a l'argument dal dumber da fugitivs.

En vista a la vieuta demografica vegnia l'economia confruntada adina da-

pli cun ina mancanza virulenta da forzas da lavor qualifitgadas. Er en il Grischun datti adina dapli plazzas da giarunadi che na pon betg vegnir occupadas. L'onn 2014 è quai stà 566, l'onn 2015 583. Damai che la conferenza per agid social ha constatà che la quota da persunas senza furmaziun professunala saja gia oz fitg bassa en Svizra na fetschia i betg grond senn da metter a disposiziun generalmain fugitivs renconuschids u recepids provisoricamain sco forzas da lavor auxiliaras. I saja perquai in cumond dal temp da nizzegiar consequentmain il potenzial da gliud indigena per l'economia grischuna.

Integar fugitivs en il process da lavor

Per motivs economics, dentant era per motivs socials e da segirezza saja convenent da nizzegiar optimalmain il potenzial purschend a quests fugitivs la pussaivladad d'acquistar las qualificaziuns professunalas necessarias e d'integar els uschia en il martgà la lavor.

La Conferenza svizra per agid social pretenda plinavant ch'i vegnia interprendì tut il pussaivel per che las furmaziuns gia avant maun tar ils fugitivs vegnian renconuschidas e che lur resur-

sas possian uschia vegnir tratgas a niz. Plinavant stoppian els avair gia baud la pussaivladad da rimnar experiencias sin il plaz da lavor sco era d'emprender las linguas naziunalas. Tenor Perl dovri er ina collavuraziun cun l'economia per stabilir programs da qualificaziun correspundents che tegnan era quint ultra da las sfidas linguisticas era da las sfidas interculturalas.

Per che l'integrasiun professunala gartegia dovri decisiuns speditivas davart il status da fugitiv, ina cussegliaziun professunala e curs introductivs cun curs accompagnants da lingua ed ina recepziun uschè speditiva sco pussaivla en il mund da lavor u en la furmaziun professunala. Tenor Perl stoppian ins era fixar cleras obligaziuns per la qualificaziun professunala. Ina cooperaziun activa da l'economia, la reducziun dals impediments administrativs ed ina coordinaziun optimala da las stentas da confederaziun, chantun e vischnancas saja necessaria, scriveva Perl.

La fracziun socialdemocratica pretenda da la regenza da daventar activa en il senn menziunà e da realisar tant pli spert las mesiras proponidas en collavuraziun cun la confederaziun, il chantun e las vischnancas.